



ル 5
3150
20



門 5
號 3150
卷 20

黔南識略卷三十一

貴州巡撫長白愛必達撰

桐梓縣

桐梓縣在府治北一百二十里省城北四百四十里
漢夜郎縣地屬牂牁郡晉仍屬牂牁郡永嘉五年甯
州刺史王遜分置夜郎郡治夜郎隋並入牂牁縣唐
貞觀十六年開山洞置夜郎縣於舊播州城兼置珍
州天寶元年改為夜郎郡乾元元年復為珍州元和
三年州廢以夜郎屬濠州復置珍州宋乾德四年改
曰高州尋曰西高州後入於蠻大觀二年復置夜郎

今司成卷三十一

縣屬溱州宣和三年廢元置珍州思甯等處長官司
明洪武六年以其地析置播州松坎桐梓三驛萬曆
二十九年平定播亂以舊夜郎縣望草地置桐梓縣
取驛爲名屬四川遵義府

國朝雍正五年隨府改隸貴州其境東至羅五山綏陽
縣界五十五里西至牛渡河仁懷縣界七十五里南
至婁山關遵義縣界三十里北至界牌四川綦江縣
界二百六十里東南至石炭關遵義縣界三十五里
西南至楠木廠遵義縣界三十里東北至大地槽四
川南川縣界四百五十里又至深坑正安州界三百

一十里西北至水潦仁懷縣界一百六十里又至黃
泥均綦江縣界一百四十里縣爲四川入黔首程地
與蜀省綦江南川二縣犬牙相錯及郡轄四屬皆接
境控扼要區也城周三里七分計六百八十二丈登
以石門四明萬歷年間建後因河漲縮城避水僅及
初築之半後因舊基增築乾隆二十九年重修魁巖
山在城東半里上有池山後有天橋高百餘丈石女
山上有石如女立明月山在城東九十里相近有九
龍山牛星山在城南半里與縣對峙金馬山在城南
一里鼎山在城南十里踞羣山之巔四圍削壁其形

似鼎元置鼎山縣卽以此山爲名金鵝山在城西一里山下有井井中常見雙鷺羽色如金故名玉屏山在城西二里虎峯山在城北半里相近又有蒼龍山鳳鳴山在城北二里天祿山在城北二里貓兒山在城北一百三十里元四川囊加台攻破播州貓兒壩隘宣慰使楊燕里不花開關納之當卽此扶歡山在城北二百里唐扶歡縣以此名楚米坡在城東二十里平播時楚人餽米至此故名陳頭箐在城南四十里夜郎小箐在城北三十里松坎在城北有松坎巖奇峯突出峭壁無階明史四川土司傳楊應龍反總

督邢玠檄應龍安穩聽勘應龍縛渠魁待罪松坎案驗論贖於松坎設同知治焉卽其處也龍罩臺在城西四十里桐梓原在城北三十五里夜郎壩在城北七十里有古夜郎城舊址明劉綎踰夜郎舊城是也三元壩在城北九十里葫蘆洞在城西五里深數里內有三層奇石肖各形象明邑令萬建侯額曰天外賞大學士王應熊有北顧巖三字俱鐫洞口蟠龍洞在城西南六十里有石如龍蟠龍水出焉竹王洞在夜郎里蒙渡河在城北七十里傳漢唐蒙渡此源出縣北境山有兩源合北流百數十里曰松坎河西南

有一小溪注之又北數十里坡頭河入焉盤繞縣境入四川南川縣界又北至三溪口始通舟楫逕綦江縣東而北又西北流至江津縣入大江明史地理志桐梓縣北有熨溪源出山箐綦江之上流案方輿紀要綦江卽夜郎溪也自南川縣流入亦曰南江至綦江縣色如蒼帛因名綦江亦曰東溪入江津縣謂之熨溪又明志綦江縣南有綦江卽熨溪之上流是黔境尙無熨溪之名明史蓋從其究言之也漢書西南夷傳發巴蜀卒治道自熨道指牂牁江當卽此毋渡河在城北一百二十里坡頭河在城北一百四十里

齋郎河在城西六十里齋郎者苗民也河以名焉源合龍巖山水遶縣東楚米坡逕縣城南流謂之水坎河經仁懷縣之二郎里至二郎灘與赤水河合俗呼爲米糧渡下流入岷江官渡河在城外一里寬丈許左發源於城東三十里之楚米坡右發源於距城十五里之黑石溪近城之楊村溝陽家河溱溪南溪水皆滙焉又十里爲方家洞再二里流分爲二左入葫蘆洞卽俗所謂消水洞右爲周家洞洞口穿山而過爲大馬孔總名馬家壩距城僅十五里水至此四山圍繞並無出路向由二洞瀉水自乾隆五十三年後

惟葫蘆一洞尚能消納其餘方家各洞先後淤塞每
春夏山水漲發縣受其患議者謂自馬江壩過梅子
井爲壽國山山外爲水坎河馬江壩高水坎河二三
十丈導流較便計梅子井至水坎河長約二百五六
十丈壽國山腰約長一百四十五丈自應於壽國山
鑿開暗河以達於水坎河但葫蘆洞低於馬江壩若
待河水漫溢然後歸入暗河恐平原已成巨浸而周
家洞上通官渡河下達馬江壩最爲扼要關鍵應於
周家洞至梅子井地方先開一明河以導之水出周
家洞由明河而入暗河水勢自當順流而疏暢並於

周家洞前後按其舊迹挖深五六尺令無阻礙則水
得歸宿縣城永無水患道光十一年河水泛溢漂民
居經巡撫嵩溥飭官勘明奏請動項開鑿漸次疏通
水行可期順軌矣清溪在城南二十五里溪中有井
每日三潮趙洋水在城西九十里官堂水在城北十
里爲諸水所經婁山關在城南二十五里與遵義縣
接界張九關在城東北二十五里石壺關在城東北
三十里蒙渡橋在城北九十里爲黔蜀要道康熙五
十七年知府趙公榮建因名趙公普渡橋平夷廢縣
在城西北案此乃晉建興元年置治平夷縣與營縣

夜郎同屬郡若蜀漢之平夷郡係今雲南曲靖府地
不在此也廢營縣在縣北廢珍州在縣東夜郎廢縣
在縣東案秦漢之夜郎西距邛笮東接交趾地凡數
千里唐武德四年析夷州之甯夷縣置夜郎八年析
巫州之龍標縣置夜郎十六年開山洞置珍州亦置
夜郎靖道謨夜郎考曰龍標之夜郎當在今黎平鎮
遠間夷州之夜郎當在今石阡思南間珍州之夜郎
則今遵義之正安州桐梓縣矣巫州夷州之夜郎或
廢或更名珍州之夜郎置最後而自唐迄宋名未嘗
改於是人只知播州之爲夜郎亦不復知夜郎之大

矣漢七王墓在城南五里相傳卽竹王父子之墓縣
轄五里曰東芝里蘆溪里漆溪里夜郎里婁化里現
在成熟田四萬二千二百餘畝土八萬七千八百餘
邱東芝里之好芝壩蘆溪里之黑石溪漆溪里之元
田壩俱有溝堰蓄洩可稱膏腴夜郎婁化二里土俱
瘠确徵米九百石八斗有奇除支放兵糧廩餼外餘
米三百餘石變價解繳道庫徵銀三千六百八兩有
奇除改徵米石及扣存各官春夏二季廉俸銀兩實
解藩庫銀二千五十餘兩常平實貯穀一萬石有奇
學校文武額十名義學一民知儲積米無外耗足敷

民食場市八各有定期樹有桐杉梓漆青桐等木育
蠶織繭有雙絲水絲二種名曰桐綢較遵義正安稍
遜無銅鉛礦廠有麻柳灣稅口由府經管苗有犴猪
鴉鵲紅頭三種舊有六百六十餘戶近遷興義及安
南等處散住零星共一百一十七戶均係薙髮苗民
無土司管轄皆編入保甲通漢語風俗亦與漢民類
設塘汛十六處城中駐劄桐梓汛千總一員把總一
員兵一百一十名乾隆六十年移把總一員兵二十
名駐松坎汛無驛遞渡口南至省北入川爲大道西
通仁懷東抵綏陽縣爲僻徑餘與各縣同

綏陽縣

綏陽縣在府治東一百里省城東北三百八十里漢
牂牁郡地隋招慰置綏陽縣古徼外夷也唐武德三
年屬義州貞觀十一年改屬夷州宋大觀三年改置
承州仍治綏陽縣宣和三年州廢以縣屬珍州明萬
曆二十七年以舊綏陽縣地置今縣隸四川

國朝改隸貴州設知縣一教諭一訓導一典史一其境
東至正安州界八十里西至遵義縣界四十里南至
遵義縣界三十里北至桐梓縣界三百里東南至湄
潭縣界四十里西南至遵義縣界五十里東北至正

安州界一百五十里西北至桐梓縣界一百五十里
廣六百里袤二百三十里水繞提封山環保障蜀東
門戶黔地咽喉城周四百七十丈甃以石門四明萬
曆二十九年建望京山在城東七里達摩山在城東
九里永山在城東南二里彭山在城南三里冠子山
在城南十二里明史李化龍平播劉綎克後水囤營
於冠子山會馬孔英吳廣軍軍海龍囤下是也拱辰
山在城南一百五十里山勢北向故名平木山在城
西南五里有宋冉璉故居扁桶山在城西九里又西
里許有筆架山金子山在城西十五里相近有辰山

風坎山在城西六十里舊有關明馬孔英征播州奪
桑木關逐北至風坎關是也又有仙人山上有石坪
遺蹟石牛山在城西二十里橫亘數里常有積雪不
消朗山在城西二十五里明馬孔英由朗山進蒙子
橋深箐翳賊處處設伏悉剿平之卽此長幹山在
城西六里一名白玉山爲縣治來脈西山在城西北
二十四里與長幹山相連鳳凰溪源出焉天臺山在
城北二里上有池廣可五畝四時不涸望靄山在城
北十里有礮霄洞周約四五里中有天生石牀盤盂
等物又名神仙洞何家山在城北一百五十里兩峯

切雲昔有何道者棲此香爐巖在城東十五里銀子巖在城西十八里又西二里有璞老巖源溪在城北十里朗水在西又名螺水源出朗山達溪在東南源出楊柳水經達摩山西流與朗水合繖水在東南合達溪朗水流入烏江黑澤水一名清水河流入繖水厚水在東南源出趙家里經長灘入烏江渡口水在北卽合口河下流於烏江又南有渡口落汪渡右合渡口水石梁河在北源出桶關與渡頭河合浦淅水在北一名大灘源出湄潭山箐中與渡頭河合又灤水及黃魚溪皆入合口河小烏江在東北六十五里

源出椒溪流經南川入涪江三朝水在北水自洞出每日辰午酉三至不爽紫蓮池在城東康熙十一年荒田數畝浸而爲池自生紫蓮因名金子壩在城西有金子池大可百畝相接有蕭家溝上有蕭家洞明叅將周國柱攻金子壩無一人疑有伏焚空砦十九巖兵以待賊果突出擊破之是也都上廢縣在城西南二十五里義泉廢縣在城西南百里甯夷廢縣在城東二百里高富廢縣在城東北百十里洋川廢縣在城西北百里雞翁廢縣在城東南太平寰宇記江南西道夷州理綏陽縣鄉四波利山在縣北二十里

安徽水一名孤微水西自綏陽故縣來東流經縣南八里又東入都上縣界涪江水在縣東十八里南流注安徽水

涪水一名沃野水西北自綏陽縣界流入今縣西十四里又折西南流入廢雞翁縣界義泉縣離支水東北自廢綏陽縣流入西流經縣理西又東南流入廢樂安縣界以上山水惟涪江水卽今烏江之下流餘皆古今異名難以互證矣九杵關在城東三十里明馬孔英連破九杵黑水諸關苦竹羊崖銅鼓諸寨是也石卯關在城東三十五里苦竹關在城

東九十里與湄潭縣分界處板閣關在城南七十里朗山關在城南二十五里通郡城桐梓桑木關在城東北二十里通正安州明馬孔英入眞州用土官爲鄉道別遣邊兵先扼明月關連破四寨次赤崖抵清水坪封甯關破賊營十數逼桑木關關爲賊要害山險籌深憑高拒守官兵殊死戰奪其關卽此龍洞關在城東北一百里長灘渡在城西通郡城渡頭河在城北有官船濟渡馬桑木橋在城西水面橫木圍四尺五寸水漂不動傳有欲伐之者舉斧雷電忽作斧跡尙存宋合州知州冉璉合州通判冉漢墓在朗水

里所屬金朗趙旺四里共成熟田七萬二千八百一
畝有奇山土一十二萬九千七百七十七畝有奇改徵米一千
三百八十六石有奇徵銀三千三百三十五兩有奇
常平倉實貯穀二萬三千九百四十石有奇溢額穀
三百三十七石有奇兵糧於改徵米內支給場市七
樹惟楓柏白楊青桐桐竹之屬土產藍靛皮紙漆茶
桐油白蠟五倍子之屬無銅鉛礦廠亦無稅課苗惟
花苗一種能織蔴布製木盤善捕禽獸婚喪歲時俱
以牛犬爲禮無土司管轄通屬漢莊二百五十苗寨
十一計五十二戶設一汛七塘關有七東曰龍洞曰

苦竹曰石卯曰九杵曰朗山南曰板閣東北曰桑木
均屬扼要之所城中駐劄遵義協分防把總一員兵
五十名無驛遞東西路設有舖夫遞送公文長灘
及渡頭河設有官渡大道二一由桑木關抵正安一
由朗山關抵桐梓遵義捷徑二一由鄭場抵湄潭一
由楊桶出綦江南川金里之七八甲近湄潭趙里之
四五甲近桐梓去城遼遠時防匪徒民多爭控界址
及婚姻之事蓋界從未立石而合婚俗以插香爲定
也

仁懷縣

仁懷縣在府治西北二百六十里省城西北六百六十里漢夜郎郡地唐貞觀五年置芙蓉縣屬鄂州尋以縣屬牢州十六年廢牢州改屬夷州二十年又改屬播州初置在芙蓉山下因以爲名後移於州東南三里開元二十六年以瑯州縣省入芙蓉縣宋大觀三年置仁懷縣宣和三年廢元播州安撫司地明萬曆二十九年置仁懷縣隸四川遵義府

國朝雍正五年改隸貴州九年移縣治於生界之亭子壩設知縣一教諭一訓導移駐仁懷廳典史一其境東至桐梓縣界四十里西至四川叙永廳三十里南

至遵義縣界四十里北至四川合江縣界四百五十里東南至遵義縣界四十里西南至大定府黔西州界一百四十里東北至四川綦江縣界四百二十里西北至仁懷直隸廳界一百六十里縣境濱播枕永襟合帶瀘爲扼要區城周二里五分登以石門四雍正十一年建翠幃山在城東十五里自西南迤而東橫亘百餘里爲縣之鎮山夕陽山在城西里許端山在城北一里玉屏山在城北二里筆架山在城東北十五里關門壘在城南三十里峯嶺高聳平列十七峯懷陽洞在城南十三里懸崖當路如屋下覆中有

鐘乳結成人物各象知縣程玉坤泐曰懷陽洞書畫
巖在城南五里峭壁劍立黑白成章二郎壩在二郎
里明史吳廣屯二郎壩是也巖鏜口在城南十里四
面巉削萬仞直立其下爲澧溪卽鹽井河之上流爲
廳縣赴省必經之路路寄巖腰過者危慄加以溪水
迅激頑石阻流每春夏盛漲徒涉者間爲漂去縣境
第一畏途也三十灣坡在城南四十里層高重阻延
緣拘折赤水河在城西四十五里自畢節縣流入縣
界經李博里安羅里至茅台村始可行船商旅由此
駕舟以通蜀鹽流入仁懷廳境至四川合江縣入岷

江方輿紀要大江在合江縣北至縣治東有之溪流
合焉因謂之合江又有之溪源出仁懷縣境環繞如
之字卽赤水河也澧溪在城東數十步溪上石立無
岸出地底自東注西與赤水河合官渡河在桐梓縣
境流經安羅里二郎里至二郎灘注赤水河高洞河
自縣治吼灘里流經赤水里至官渡塘可行船有關
稅屬經廳管至溪在城東北一名魚溪福泉在城南
門外味特清冽灌田百畝魚泉在城南七里其泉有
二俱在溪邊春三月間出鯀魚味甚美逾期卽不復
出濕泉在城西十五里浴可愈疾考明史地理志仁

懷縣東南有芙蓉江西南有仁水其下流俱注於烏
江方輿紀要仁懷縣仁水縣西南一里或曰卽之溪
上源也曲折流入瀘州合江縣界而注於大江又芙
蓉水在縣東南三里東南流合於湘江亦曰芙蓉江
唐以此名縣案縣於雍正八年移今治舊城卽今之
仁懷廳也縣之南境均與遵義縣錯壤則仁水卽遵
義之仁江紀要以之溪當之非也今廳境近城之水
並不通烏江云芙蓉江在縣東南三里亦誤芙蓉廢
縣在縣南胡刀廢縣在縣西南舍月廢縣在縣東南
以境內舍月山爲名羅爲廢縣在縣西以縣南羅爲

山爲名縣轄七里地方安博李博爲上二里二郎小
溪吼灘丁山赤水爲下五里上二里與蜀省永甯及
大定黔西連界下四里與蜀省之敘永綦江江津合
江等縣交錯距城四五百里不等田土最高者爲箐
地次則爲半山下爲花廠箐地田土氣冷有大春無
小春宜稻菽小穀稗子高粱包穀而民間尤恃包穀
爲日用之需其稻穀種於當壩處可斗種而石收平
壩向陽之地可收二石久雨則損秧早則凍被風傷
則無收故箐地之田價最賤民近於清明時先往花
廠佃田栽秧而後移種於箐地花廠地低近河居民

黔南諸脚卷三十一
多種棉花額徵條糧銀二千一百三十七兩內改徵米六百二十七石實應徵銀一千六百五兩有奇銀米並一五加耗徵收之法十戶一單頭每年輪換督催花戶自行完納縣倉實貯常平等穀九千五百九十三石有奇改徵米四百一十九石有奇社穀二十石卽貯縣倉兵糧於改徵米石內支給學額八名義學三分防把總一員兵一百名濕水汛外委一員兵十一名集場二十一處各有定期樹多青桐李博等里資以養蠶桐茶所在皆有芽台村地濱河善釀酒土人名其酒爲芽台春苗有青夷白夷猓羅

鬼青犴猪紅犴猪紅頭鴉鵲馬韉十種青夷白夷仲家能通漢語漸染華風餘苗尙循夷俗無土司管轄通屬漢戶十之六七苗戶十之三四通府道路昔由鹽井河橋經生界關門壘大毛坡井壩等塘至倒流水合路迂故至府二百六十里今改由巖鏟口經壇廠場明廣寺三十灣大壩長崗山至倒流水合古路路捷而大故今至府一百八十里又由倒流水至鴨溪口繞石板場至螺螄堰爲合府上省大路通川省大路三一爲溫水汛通綦江一爲兩路口通江津一爲高洞通合江卽今通仁懷廳之大路也餘與他

屬同

黔南識略卷三十一終

黔南識略卷三十二

正安州

貴州巡撫長白愛必達撰

正安州在府治東北三百五十里省城東北五百四十里漢爲夜郎地唐貞觀十七年置播州鎮後因州中有降珍山乃以鎮爲珍州取山名郡也又置夜郎麗臯樂源三縣宋乾德四年刺史田遷上言自給賜珍州郡名以來連罹火災乞改州名因改爲高州尋以嶺南有高州加西字領縣四治夜郎縣麗臯榮清樂源三縣皆分夜郎之地以置其縣大觀二年大駱

解上下族帥獻其地復建爲珍州咸淳末以珍州屬播州領樂源縣元爲珍州思甯等處長官司屬播州安撫司至正末時明玉珍改爲眞州明洪武十七年置眞州長官司萬歷二十九年改置眞安州領縣二綏陽仁懷屬四川

國朝改爲正安州改隸貴州設知州一學正一訓導一吏目一其境東至婺川縣界一百八十里西至桐梓縣界一百里南至綏陽縣界九十五里北至四川南川縣界一百一十五里東南自車盤溝至婺川龍泉兩縣界一百三十里西南自烏後水至桐梓界一百

里東北自巴魚溪至四川涪州界二百四十五里西北自黃蓮臺至四川彭水界二百九十里州介巴黔之間拱蠻犛之要西南有事實當其衝州治屢經遷徙萬歷中平播後建治於思甯里滴水園後遷於三江里

國朝初遷於德溪土坪皆未建城乾隆三年定地古鳳卽今州城也二十四年始建城週二里九分計五百三十二丈五尺高一丈八尺門四大武山在州署前覆鐘山在州署後俱在城內又有鳳舉山在學宮後東松山在城東五里翠屏山在城東南七里舊州西

黔南諸山卷三十一
南聚秀山在城南一里龍門山在城南十里羅蒙山在城南六十里唐有羅蒙縣卽其地西松山在舊州西南六十里虹轉山在舊州西南八十里羅支山在城西南九十里明嘉靖中居人避寇於此雲頂山在城西南八里雙鳳山在城西一百七十里文筆山在城北五里豹子山在舊州北八里多霧產豹會仙山在城東北二十里州治發脈於此芙蓉江在舊州南一百里源出婺川自烏江分流東經故思義寨環流出州東南境又北入彭水縣界注於涪陵江三江在舊州北五十里一名明溪源出州西境羊毛坡東南

流虎溪水合焉下注於芙蓉江虎溪在舊州西南七十里源出遵義北委家嶺逕舊珍州城下流入三江北溪在舊州北林溪在城西南五里又五里有林溪壩貫珠溪在城西南源出州西杉木門流入州境落水孔思溪在舊州西七十里源出四川南川縣牛角寨流入州境東南流入於三江卯溪在城北山後故州城在城東南七十里瀟水園明萬歷中置城垣尙存母斂壩在城東北三江里傳漢母斂縣舊址也廢珍州在城西樂源廢縣在城西榮懿廢縣在城東南南山寨在舊州西南七十里亦謂之石城明初鄭昌

孫屯據處也又舊州東南九十里有思義寨唐初爲思義縣屬夷州舊稱珍州五堡曰麗臯曰思義皆因故州置曰白岩曰安定曰壽山則擇險置戍處也萬歷中官軍征播皆屯駐於此學額文武生各進十四名建有鳴鳳書院由義學改設舊有租穀四十石爲薪水膏火不敷由州捐給州轄德溪三江思甯小溪四里田畝肥瘠不一現在成熟田八萬九千七百六畝有奇徵米一千七百二十二石六斗有奇共徵銀二千八百十八兩有奇雍正間將地丁銀兩裁去七百兩改徵米七百七十七石七斗有奇以備每年支

放兵糧廩米餘米變價解繳常平倉實貯穀一萬三千九百一十五石有奇戶口二萬二千零九戶共計一十六萬五千六百八十三名口前有犴猪花苗三百餘戶今俱遷移鄰封州縣間有零星數名多依漢民耕作未編烟戶土產山繭紬家機紬土花綾蜜漆桐茶黃白蠟之屬向無蠶絲乾隆十三年州吏目徐階平自浙攜蠶種來教民飼養因桑樹較少先以青桐葉飼之後亦漸植桑食青桐者爲山絲質粗色劣食桑葉者爲家絲質精色美商通各省販運甚多場市四州無銅鉛礦廠石板渡二稅仍由府經管收課

設五塘 隘城中駐劄遵義協分防正安汛把總一員兵九十名每塘撥兵二名每隘撥兵二名無驛遞

仁懷直隸同知

仁懷直隸同知在遵義府西六百三十五里省城西北九百七十里明萬歷二十九年平播設仁懷縣即今廳城屬遵義府

國朝雍正八年移仁懷縣署於生界之亭子壩而以通判移駐其地專司糧稅乾隆三年以附近廳屬河西仁懷土城三里田土錢糧撥歸通判管轄十三年撥

仁懷縣訓導分駐其地四十一年題請改為直隸同知原設通判照磨改為同知照磨轄糧道其境東至仁懷縣赤水里界一百八十里東南至叙永廳交界之二郎灘二百七十里西至叙永廳界一百二十里西北至合江縣之九丈八里東北至合江縣之鱧魚溪十里廣三十餘里袤二百二十里城週五里三分甃以石門四明萬歷年間建乾隆二十五年修一面倚黔三面距蜀劃江而守最為扼要其由四川永甯入畢節以達於省者為大路其由仁懷縣而達於省者為小路跬步皆山無平田廣野其路之最險者由

東門四十里有七里坎高約七八百丈又有小關子
路絕窄狹由土城里進溝有涼風丫青桐坡木桶巖
俱約有五六百丈由東皇場至仁懷縣交界有土豪
壩尖山峻嶺約有八九百丈又由土城至順江場有
仙人坳絕高設有塘汎又由沔灘進溝有穿風坳極
陡峻行旅爲捷徑而道路窄小宵小易藏其他巉巖
峭壁高出雲表者小民每於絕壁石隙栽種雜糧時
有跌墜之虞至廳屬之大江源通赤水經茅台村由
仁懷敘永之二郎灘入廳境直下三百餘里繞廳城
下之淋淋灘入合江灘之有名可指者五十一若猿

灘若落妹腦灘若黃泥灘若葫蘆腦灘若阿蘭灘及
大別小別灘大沔小沔灘尤極險勇大抵岷江水深
而勢稍寬此江流駛而勢較窄峻峯迫於兩岸怪石
梗於江心盛漲泛舟三百里一日可達也按圖經赤
水河逕脉因塘北有古蘭河自西南來注之水道考
以蘭爲藺字之譌當以古藺字得名阿藺灘疑卽此
水又赤水至土城西有水思河自東來儒溪泥溪自
西來並注之又西北有盤橋溪又東猿猴溪自西南
先後注之又葫蘆溪與溱溪南溪二水會金沙溪自
東來注赤水河諸河皆在此水左右或古今異名耳

黑南詩冊卷三十一
六
葫蘆關在城南五十里中箐關在城西八十里黃葛橋在城北手爬厓側永安橋鎮江橋俱在城內地自明初楊鑑內討改播州宣慰使司屬四司統田張袁羅譚盧吳七姓今廳屬三里生齒日繁土城一里與敘永仁懷縣二處交錯又爲蜀鹽商船之所屯泊距城遼遠川匪潛踪由廳城逆流而上非五六日不能至陸路則逐節奇險徒步皆艱防範宜爲周密餘處則士習詩書農安耕鑿生計裕而訟獄稀視他郡縣爲馴良焉學額乾隆四十一年始分廳學取文生四名武生二名廩增生各八名嘉慶十七年部準取武

生四名與文生均由遵義府仁懷縣二處分撥舊有義學一嘉慶七年改建雙城書院設租穀道光八年以雲頂寺租穀六十石易價分作士子鄉試路費又建養正義塾設租穀四十八石田畝仁懷河西二里水田較多頗稱腴壤土城一里地氣瘠薄宜雜糧現在成熟田地共二萬三千五百六十五畝實徵正耗及耗米變價共銀六百五十兩七錢有奇常平倉實貯穀一萬七千三百九十二石四斗有奇本城貯義倉穀二百石土城璉珉宮猿猴鎮石梅寺新建便民社倉共貯穀四百石兵糧以改徵米及赴糧道領銀

今有載各卷三十一
七

探買米共五百五十七石四斗有奇支給豐年產米
僅敷民食歉歲全資商販市斗準倉斗三斗場市十
三在仁懷里者三在河西里者二在土城里者八各
有定期山中多植藍靛杉木楠竹及山茶木漆之屬
荔支爲通省所無係專產無銅鉛礮廠稅口四額徵
稅羨銀三千有奇苗惟馬鞞一種性頗淳隨所佃之
土爲居遷徙無定無土司管轄通屬皆漢莊苗民零
星散處僅七八十戶設二汛十三塘城中駐劄遵義
協都司一員千總一員額外二員分防猿猴汛把總
一員仁懷舊縣把總一員溫水汛外委一員共兵四

百二十二名渡口三日北渡口夾丫口曰渾溪渡皆
通川水陸孔道乾隆五十一年以後增設風溪石梅
渡截角丫渡背照渡俱設有渡船餘與他郡同

論曰仁懷廳境遠懸於巴蜀之間地狹而險蜀鹽舟
運入廳界上至於仁懷縣屬之茅台村而止邪許之
聲相接於岸奸匪最易叢積同知之設所以資彈壓
非僅權稅課已也黔中普安等處向食滇鹽因價值
太昂恐致累民經前巡撫慕天顏王繼文先後疏稱
普安等處遠在萬山之中民苗野處日給艱難以黑
井最貴之鹽行於該處最窮之地不特民苗告苦卽

商竈亦受賠累故令食川鹽卽交相慶賀令食滇鹽卽環庭泣訴並請將滇省無著鹽課照數豁免蓋川鹽不拘勛數零星可買而滇鹽必須整塊川鹽價賤每勛不及三分而滇鹽價重溢於四五分以外也我朝加惠窮黎無微不至黔省尤爲優渥於今民食蜀鹽有司不必爲之定價聽從商民隨便貿易誠垂之萬禩而利賴者也所全豈淺鮮哉

